

涉縣志卷八

知縣戚學標重修

藝文類

記序

雜文

詩

利應侯廟記

元

顏之啟

教諭
魯人

世有超千祀而挺生奮百代而特立者大概有三
一曰神以燭機二曰忠以事上三曰義以扶教若
然邪媚不足以蠱其心富貴不足以奪其節威武
不足以挫其志用於世可以開物而成務垂於後
可以起懦而廉頑其生也不苟其死也有爲吾於

利應侯見之矣按春秋左氏傳侯姓狐氏名突爲
晉大夫時獻公惑於驪姬一時嬖倖饗竊榮寵蠹
亂國經二五之徒譖羣公子出居外使世子申生
伐旱落氏意欲罪廢有勸世子戰者侯曰內寵竝
后二政嬖子大都稱國亂之本也孝而安民子其
圖之侯欲冀世子全身避禍他日復國未可量也
較之陶意曲從陷君不義若苟息輩徒守小信死
不償責者亦有間矣謂之不助理者能如是乎及
惠公君晉侯適下國遇申生告侯曰夷吾無禮余

請於上帝將以晉畀秦秦將祀余侯曰不可臣聞
之神不散非類民不祀非族君祀無乃殄乎且民
何罪矣失刑乏祀君其圖之後惠公雖戰敗辱於
秦未幾復國侯之力居多視彼愎強自用手弑二
君若平克之徒不可同年而語矣非素行相孚血
誠爲國孰能暴白於冥冥之際若此哉謂之不忠
於上者能若是乎逮懷公嗣立命追從亡人者期
期不至殺無赦毛偃在秦弗召懷公執侯曰二子
來則免對曰子之能仕父教之忠古之制也策名

委質二乃辟也今臣子名在重耳有年矣若又召
之教之二也父教子二何以事君刑之不濫君之
明也臣之願也淫刑以逞誰則無罪臣聞命矣遂
死之夫文公未復流離四方苟順君意必獲寵祿
侯乃明父子之道以伸古制敷君臣之義以厚邦
典誘之以好爵而不恤臨之以白刃而不懼視死
如歸凜然若生其操行之堅等山嶽而不拔其立
言之卓終天地而不朽孔子謂殺身成仁此實近
之比之知義方之教諫其君而不知訓其子若石

礎者不啻霄壤矣此其扶持名教之功爲何如哉
嗚呼姬轍旣東上綱解紐天下之勢滔滔汨汨侯
獨揭大經大法於壞敗之餘敘天理彝倫於攸斁
之後豐功盛烈雖不克顯於當時其遺澤流風猶
足以垂範於後世可不謂之超千祀而挺生奮百
代而特立者乎是可祀已舊廟在涉邑井店里之
東狹隘圯毀今卜爽塏而改築之凡三楹門亦如
之其工傭匠石之施餽饌丹青之費皆自義士張
伯原等仍請文諸石余辭不得已於是乎書遂作

迎享送神辭以遺之俾歌以祀神焉辭曰清漳之
濱兮太行之阻繫侯之宮兮維侯之宇薦肴蔬兮
奠芳醕伶抱鼓兮亟以舞神歆饗兮此客與降嘉
祥兮時風雨福我人兮宜稷黍神之來兮斯主神
之去兮帝所沐靈貺兮綿延長無絕兮終古元至
元十三年記

重修涉縣記

明張昇

儒士

黎城人

郡邑多因山水得名涉四面皆山清漳一帶潞洺
山足趨縣治者必涉焉因名涉爲秦晉之要衝實

中州之邊鄙也在兩漢爲沙屬魏郡至晉裴嶷平
後魏縣廢隋開皇十年重置屬上黨郡武德初附
韓州十三年移於今所置漠縣今在縣西二里貞
觀十七年州廢屬潞州今按兩漢志並名沙皆屬
魏郡今相州也後漢志沙侯國有龍山今縣南臨
漳水北枕龍山次南有吾兒峪卽壺關口至魏始
作涉建安九年四月留曹洪攻鄴公自將擊武安
尹楷破之涉長梁岐舉縣降賜爵關內侯晉復隸
廣平郡後魏天賜元年三月限縣戶不滿百者罷

之北齊天保七年又併省縣五百八十九今青頭
山靖定大師碑及惠安寺刻皆北齊天統間立並
隸臨水縣又唐十道志漢沙漠時在魏郡武德三
年移於潞州其漠縣在縣西北二里有清漳水一
名涉河此水東經涉縣縣因名之又積布山狐茂
塚注云在壺關卽上書訟戾太子寃者今涉境有
積布山而不見此塚古圖經復有溪王墓在縣西
南隅一百五十步及馮亭墓在縣東三里韓王山
下乃韓上黨太守也廟貌在焉廣韻云涉亦漳水

別名舊唐書云涉係漠縣隋屬韓州貞觀十七年
州廢屬潞州五代泊宋與元並仍舊名然涉自古
地屬晉封世傳爲涉陀城至於前人賦咏形於詩
詞鄉談俗諺無不名爲涉陀按左氏傳定公七年
齊侯衛公盟於瑣注瑣卽沙也公羊傳盟於沙澤
穀梁傳及地經亦云盟於沙凡此皆欲叛晉因而
晉涉陀有事澤之盟皆一時事疑涉陀封邑卽此
而左氏經注復云陽平元城縣有沙亭未知孰是
嗟乎時有古今事有得失其間沿革安能盡詳今

我聖天子御極之初削平暴亂海隅日出悉歸版
圖縣丞吳君首蒞茲邑披荆棘闢草萊興學明農
修舉廢隆誠可謂無忝厥職者矣一日於治政之
餘考風化之淳漓觀山川之形勢追曩事於風流
雲往得斷碑於頽垣瓦礫欲後人不失所自乃琢
石命余爲紀其實焉時洪武庚戌仲冬月記

遊奉聖寺記

明 張應登 參政

余有事乎西山循洛水而南入涉境暮雨行不前
大尹左公鴻儒止以西戍之署是夜風止雨歇淡

川疎星坐落西山如屏而高雞鳴犬吠又以衛我
於雲端絕無塵囂氣遲明從輿迂道青龍山山之
形蜿蜒如龍首尾鬚爪不絕三三兩兩相顧而伏
龍之領下爲奉聖寺不知所自殿宇僧房佛閣
鱗甲集也殿之東麓爲龍前足上有古栢枝肖觀
音手而老鶴巢其上僧謂龍喜播動而觀音以千
萬億之化一化爲栢以降之鶴亦大鵬之一化也
從栢之西南盼望石橋一券煙霞從券中起騰騰
指栢久雨必霽久晴必雨鶴去必來鶴來必去以

此候之無一爽者何神異若是也地幽景適作屋
啟扉西面對栢日伺飛煙爲計幽葆光之寄其山
之有緣於我歟我之有緣於山歟自殿閣迄栢左
右大尹皆以觴往觴之尋山而下至寺門有石碣
曰左公淨土蓋大尹以俸易地爲僧蔬圃而僧所
以識之者又一因緣盛事矣踏歌而往坐橋上觀
煙無何而栢下僧呼煙又指栢來矣相與神之於
林頭濡泥水書飛煙橋三字於石大尹請曰山以
龍勝龍以寺勝寺以栢勝栢以煙勝而今又以名

公之遊爲一勝矣不有紀述勝將何傳遂識之
不勝萬古在也鉅眼者瞥然鑒之

新作石城記

明王

科

邑人給事中

嘉靖二十有一年歲在壬寅夏四月涉縣石城成
先是奉敕巡撫河南都察院右僉都御史餘姚魏
公有本暨巡按河南監察御史歷城趙公有本會
議事宜以倡率三司復委官分據林涉等縣諸險
阨召集義勇以防寇至時左布政泰興張公聽右
布政聞中任公維賢等合謀協忠務以安靖地方

魏公尤夙夜祇懼統率官兵親詣林縣駐劄復條
擬十二事具奏上請多行之曰修理城池曰整飭
兵馬曰齊備器械曰推舉將材曰團結鄉保曰弭
消內盜以立先事之防曰控扼關隘曰清斂原野
曰挑選精銳曰招募義勇曰設處糧餉曰嚴固河
防預圖應變之用而涉正當澤潞通途專委淇縣
主簿宋愷會同涉令楊綸分役包砌石城工始於
辛丑十月成於嘉平幅員三里許墻高三丈餘濶
一丈五尺馬道一丈隙地一丈二尺外池面三丈

底二丈五尺深一丈五尺引漳水注其中是役也
夫稽於里石取於山灰料分丁燒運塼磚按糧出
辦宋楊二侯設處彩帛以勵勤者又修南北城樓
二建角樓四窩舖四典史德州侯天爵亦贊勤之
內衛涉民外屯戍兵一勞而永逸卽此足以仰竄
魏公之心遠矣哉使前所奏盡舉行寇寧敢復玩
我耶科樂觀涉城之成而喜其規制之備因詳書
以示後焉

重修儒學記

明

張夢斗

邑教諭
懷安人

嘉靖己未六月閩人張夢斗來司涉學政事主之
日見羣材萃焉羣工趨焉藉藉於孔子之庭詢之
則曰茲庠肇於洪武之三年修於成化之九年迄
今幾百載矣敝而修之勢也先是學諭蔡君銘暨
學訓龐君璽上其事於兩院兩司提學道府州俱
報允矣歲歉民病尙無有任其事而終之者迨邑
侯王公來治涉謁廟卽惕然曰嘻敝甚矣事無
於此者矣詎可諉諸時誰而謂後有待哉於是
弛務之可已者而經畫乃心分任惟以本

積倉之米工役取諸餘閒之夫諸所不足者悉
爲之調度區畫不騷於民而廟貌齋房煥然一新
舉於是年之五月至十月而訖工焉余惟爲政者
急先務而舉事者貴崇要廟庭以祀孔子學宮以
教國之子弟非政之最急最大者歟公殫心竭力
克成茲舉是急而大者旣先之矣則凡百廢之未
振者固可以漸而興也落成之日公曰此學旣一
新矣取諸士而新之非二先生責乎可無錫之乎
夢斗作而言曰士之所以學學孔子之以日新其